

[www.BibleForChildren.org](http://www.BibleForChildren.org)

# Itanta-nakari 3



Aritaki ipaitakiro iina yoka  
Adán "Añaantsi", tima  
irootaki irinirotyaari inkarati  
añaayi-tatsiniri. Ikantai-tziro  
iñaaniki irirori-payi "Eva".



Pairani yotani ikantawita maranki,  
yanairi maaroni antami-wiri ikaratzi  
iwitsika-kiri Pawa. Ikanta apaata  
maranki ari isampitakiro kooya,  
ikantziro: "¿Omaapiroma ikantzimi  
Pawa: 'Airo pithotziro okaratzi  
pankitachari pankirin-tsimasiki?'"



Akanakiri kooya,  
okantziri: "Kantacha  
nonthotiro okaratzi  
pankitachari anta,  
irooma satikainchari niyaanki-masiniki,  
airo nothotziro. Tima ikantakina Pawa:  
'Airo pithotziro irona, airo  
pairikiro kapichiini,  
pikami = kari.'"



Ikantzi maranki:  
"Thaiyaantsi,  
airo pikami. Tima  
iyotzi Pawa aririka  
pinthotakiro chochoki, ari  
piyotana-kiro kamiithari  
aajatzi kaaripirori, ari  
pinkimi-tanakyaari  
ikantara irirori."



Oñaatziiro kooya iroka chochoki  
kamiitha okantaka, oniwitana-karo  
onthotiro, onintzi ontzimi oyotani.  
Aakiro chochoki, othotakiro.  
Aanakiniri oimi, ithotakiro aajatzi  
irirori.



Ari opisaiityiimo-tanakiro, oñaatyaa  
osaika-miriki-jiitatzii. Aajiitaki osi  
pankirintsi, ositzikakiro, irootaki  
owasita-nakari.





Ikaimapaa-kiri

Pawa, ikantziri: "iAdán! ¿Tsikama  
pisaikika?" Ari yakanaki irirori, ikantzi:

"Notharowakaatyami, Pawa, nokimawaimi  
paniitapaji pankirin-tsimasiki, tima kaanki-miriki  
noñaaka, irootaki nomana-pitha-tantamiri."





Ari isampitana-kiri, ikantziri: “¿Paitama  
kantakimiri pisaika-mirikitatzii?  
¿Pithotaki-roma chochoki nopinka-kaimiri?”




Ari yakanaki atziri, ikantzi: "Kaarima kooya  
pipakinari nontsipa-tyaaro, irootaki opakinarori  
iroka chochoki nothotan-takarori."

Isampitana-kiro Pawa iroka kooya,  
ikantziro: "¿Paitama pantakiri?"

Okantanaki iroori: "Tima  
yamatawi-takina naaka maranki,  
irootaki nothotan-takarori  
chochoki."





Irootaki imisito-wantaka-riri  
isaikawitakara pankirin-tsimasiki  
Posiñaariniki. Ontzimatyii  
yantawaitaji aka kipatsiki, tima  
kipatsi yaitaki pairani  
iwitsikan-taitaka-riri.



Aritaki imisitowai-takiri atziri  
pankirin-tsimasiki Posiñaarini,  
iwanaki Pawa aparoni maninkari  
tsika isitowa-piintzi  
ooryaatsiri.





Ari osaikitakari wisa-mintotsi  
iroowaitaki opaamatzi paamari.  
Irootaki shiwatachari anta airo  
yariitan-taitaaro chochoki  
añakaan-tatsiri.




Okanta apaata imaantakaro iina Adán. Ari  
omotyaataki iroori, tzimaki otomi. Okanta-siritzi  
Eva: "Nowaiyantaki iroñaaka notomi. Iriitaki  
Pawa kantakaaro nowaiyantiri."  
Irootaki opaitan-takariri otomi  
"Waiyantaantsi".



Tima iroka wairontsi Waiyantaantsi, irootaki  
ikantziri iñaaniki irirori "Caín". Ipoña  
itzimanaji pasini otomi, opaitakiri  
Abel, iriitaki iririntzi-tanakari Caín.  
Pirawai-tachari inaki Abel, iriima Caín  
pankiwai-taniri  
inatzi.




Ikanta apaata Caín, yaanaki iwankiri yasitakai-yaari  
Pawa impinkatha-tantyaariri. Ari ikimitakari irirori  
Abel, yaanakiniri Pawa itarori itzimi  
ipira, iriipiro-tatsiri iwathatzi. Oshiki  
yaakamiitha-takiri Pawa Abel, ari  
ikimitaa-kiro yasitakaa-kariri.



Iriima Caín timachiini yaakamiithatiri, ari  
ikimitaa-kiro okaratzi yasitakaa-witakariri.  
Irootaki ikisantana-kari Caín.



Ikanta apaata Caín, ikantakiri iririntzi Abel: "iIyí!  
Thami ankinawaiti owaantsiki." Ari iwakiriri anta  
iririntzi.



Isampitakiri Pawa, ikantziri: "iCaín! éTsikama  
ikinakika pirintzi?" Ikantzi Caín: "Ti noyoti. éNaakama  
kimpoyiiriri?" Jataki Caín ikinanakiro isitowa-piintzi  
ooryaatsiri ipaitai-tziro Kinawini.

Ari inampitaka-rori anta, tira  
isaikairo Posiñaariniki tsika  
ikinkitha-waitakaa-kiri Pawa.



Ikanta yapiitajiro Adán imaantajaro iina, ari itzimaji pasini itomi opaitakiri "Opantaantsi". Okanta-siri-tanaji iroori: "Ipajina Pawa pasini notomi iri impoyii-tyaarini notomini Abel, iwakiri Caín, iririntzi."



Tima iroka wairontsi Waiyantaantsi, irootaki ikantziri iñaaniki pairani iriroriiti "Set".



Aikiro yañaawaji Adán okaratzi 800 osarintsi.  
Tzimawaji itomi-payi aajatzi irisinto-payi.  
Iroka okaratzi yañaaki Adán 930 osarintsi,  
ari ikamajiri irirori.



Tima iñaakiri Pawa omaapiro  
ikaaripirotaki atziripayi aka  
kipatsiki, iro yaakowin-tapiintaka  
ikinkithasiritaro yantayitiro  
kaaripiro-yitatsiri.



Ikantanaki: "Ontzimatyii napirotairi atziri  
ikaratzi nowitsika-kiri kipatsiki, ari  
nonkimitairi antami-wiripayi,  
konthaa-yitatsiri osaawiki, aajatzi  
siwanki-ripayi."



"Tima antaro okatsi-tzimo-niintakina  
nowitsika-kiri."



Iriima Noé, kamiitha-siri ikantzimo-takari  
Pawa. Tima ikaratzi mawa itomi Noé, iroka  
ipaitakiri: Sem, Cam, Jafet.



Tima itako-pirotani iwiri Pawa  
osaawi-satzi, isinitakiri yapintziti  
Itomi inkamawintajiri, irootaki airo  
ikaamani-tantaja inkarati  
kimisanta-jirini, irasi iwiro  
yañaani-yitaji.



Roma-satzi 3:23 Tima maaroni  
akaaripiro-siritaki. Irootaki airo okantanta  
añaaayitairo iwaniinkaro Pawa.

Roma-satzi 6:23 Iroka "Kaamanitaantsi"  
okimiwaitakaro iroomi impinai-tairirimi  
antawaita-piinta-kiirori kaari-pirotaantsi,  
kimiwaitaka iriimi opiratani. Irooma  
"Añaanitantsi" okimiwaitakaro iroomi inisironka  
Pawa ipasiyitaariri ikaratzi tsipa-siri-yitaariri  
Jesús Saipatzii-totaari, Awinkathariti.

Heber-iiti 9:27 Iroowaitaki ikantai-tziri:  
Maaroni atziri aparo-satzi okanta ikami,  
impoña yamina-kotairi Pawa.



Efeso-satzi 2:8,9 Irootaki piñaantaarori  
pawisako-siri-yitai pawintaa-yitaari. Iriitaki  
Pawa kimitakaan-taarori impasita-jyaamiro  
awisako-siritaantsi, tira awiroka matironi  
piwawisaako-sirityaa apaniroini. Ari onkantyaa  
airo pinkimosiriwinta-siwaitanta.

Roma-satzi 10:9,10 Aririka piñaawaitaji pinkanti,  
"Nowinkathariti inatzii Jesús," aririka  
pawintaa-sirita-jyaari Pawa iriitaki owiriintajiri  
ikamawitaka, aritaki pawisako-siritai.  
Tima pawintaa-siritaari irirori, irootaki  
itampatzika-siritan-taamiri. Ari okantzita,  
aririka piñaawai-yitairo, irootaki  
iwawisaako-siri-yitan-taamiri.



Juan 3:16,17 Tima itako-pirotani iwiri Pawa  
osaawi-satzi, isinitakiri yapintziti Itomi  
inkamawintajiri, irootaki airo ikaamani-tantaja  
inkarati kimisanta-jirini, irasi iwiro  
yañaani-yitaji. Tima Pawa ti intyaantiri Itomi  
aka kipatsiki imishakowintajiri osaawi-satzi,  
inintatzii iwawisaa-koyitajiri.



1 Juan 5:11-13 Iroka ikantai-takiri: Iriitaki Pawa kantakai-yaaroni añaasiritan-tajyaari, tima awintaari Itomi. Ikaratzi aapatyiyaarini Itomi aritaki yañaasiritai. Iriima kaari aapatyiyaarini Itomi Pawa, airo yañaasiritai. Tima pawintaari awirokaiti Itomi Pawa, pikimisantairi. Irootaki nosankinatan-tamirori iroka ari onkantyyaa piyopirotan-tyaari pasi piwairo pañaayitaji apaata.



# Itanta-nakari 3 - 6

Storyline by: Edward D. Hughes

Illustrated by: Byron Unger, Lazarus  
and Alastair Paterson

Adapted by: M. Maillot; Tammy S.

Ashéninka Perené Bible (prq) © 2004, Wycliffe Bible  
Translators, Inc. All rights reserved.

<https://www.bible.com/bible/2136/MAT.1>

©2026 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

